

Landesbibliothek Oldenburg

Digitalisierung von Drucken

**Bibliotheca Smithiana, Seu Catalogus Librorum D. Josephi
Smithii Angli Per Cognomina Authorum Dispositus**

Pasquali, Giovanni Battista

Venetiis, 1755

Marsilius Ficinus Florentinus

urn:nbn:de:gbv:45:1-844

MARSILIUS FICINUS FLORENTINUS

Magnanimo Laurentio [1] Medici S. D.

SYNESIUS, atque Pfellus, & Iamblichus, ac Proclus, Porphyriusque Platonici jam pridem amplissimas tuas aedes ingressi, ingenuos filios tuos salutaverunt & haecenus quidem recte admodum fecisse videntur: quod autem insalutatam te reliquerint, nec egisse prudenter, nec evasisse foelices; imprudentiam ergo suam tandem recognoscetes, ut quandoque foeliciores sint, Limina nunc tua revisunt cognituri patrem, ac rursus una cum patre filios agnituri, sic protinus victuri foelicius. Quippe cum nuper compertum habeant, nec libros quidem de vita nostros, absque tuis auspiciis vivere voluisse. Comitantur praeterea hos quinque Philosophos Priscianus Lydus simul & Theophrastus. Hi enim cum Valorem meum salvere jamdiu dixerint, & ardentem optaverint, hodie te alacres adeunt, ita demum magnopere votum consecuturi, ut in primis ipsi penes te salvi, salvum faciant & Valorem, per te praecipue post Deum salvere desiderantem. Salve ante alios optime patrone noster, ac philosophos tantos apud te colloquentes foeliciter audi.



MARSILIUS FICINUS FLORENTINUS

Petro [2] Medici viro Magnanimo Sal. dicis.

Quamquam multa quotidie legitis meliora nostris, nulla tamen ferme magis arbitror vobis placere, quam nostra, si modo sua cuique maxime placere solent, sua vero cujusque sunt potissimum, quae omnium antiquissima possidentur; antiquissima certe possidentur a vobis marsiliana, spero igitur haec vobis semper carissima fore, ut etiam si somnia mittam, haec quoque quasi pro veris apud vos primum, atque per vos vera etiam apud alios habeantur. Cum igitur Synesii Platonici librum de somniis, quem nuper interpretati sumus e graeco, auctoritatem & fidem in primis apud lectorem primum, & per hunc apud alios habere desiderarem, potissimum ad te misi, quarto jam gradu post magnum Cosmum nostra lecturum, atque haec statim approbatione tua omnibus probaturum: adiunxi libro de somniis: librum Michaelis Pfelli Platonici de daemionibus non immerito, quoniam a daemionibus somnia mitti veteres arbitrabantur. Vale. xv. Aprilis MCCCCLXXXVIII.

[1] Amplissimum Virum totius Litterariae Reipublicae bono natum, Medicae gentis, Hetruriae totiusque Italiae immortale decus quis tam arcto seripcionis spatio conclusus, aequis laudibus prosequi valeat?

[2] Laurentii filio, & Leonis X. fratri, graecis latinisque Litteris, & Italica poesi probe exculto. Anno M D III, miserabili fato ad ora Garioliani submersus interiit.



MARSILIUS FICINUS FLORENTINUS

Philippo Valori viro nobili atque magnanimo P. S. D.

QUI præcipit cognosce teipsum nos admonere videtur, ut animam cognoscamus, quæ quoniam est medicina rerum nimirum est & omnia: hac itaque cognita facile sumus omnia cognituri. Ego igitur ut animam in primis assequerem, per quam consecuturus omnia forem ad Philosophos non plebeos illos quidem, sed egregios jam diu studiose me contuli. Cum vero hinc quidem Platonicos: inde vero Peripateticos anxius percontarer, eorumque responsa dissidere invicem viderentur diffidebam ab initio me voti compotem unquam fore. Verum non multo post Themistius spem mihi præbuit optimam affirmans tantos inter se philosophos non sententiam quidem dissidere, sed verbis: eandemque de anima Platonis, Aristotelis, Theophrasti sub diversis verbis esse sententiam. Incidi denique divina quædam sorte in librum Theophrasti de anima a Prisciano quodam Lydo breviter quidem, sed tamen diligenter expositum, ea potissimum ratione, qua Plutarchus, & Iamblichus Platonici Peripateticique insignes Aristotelicam de anima sententiam explicaverant. Cum igitur in his legendis Platonicos Peripateticosque esse concordantes animadverterem, habui ferme tota quod mente petebam. Atque ut & ceteri quam primum habeant librum hunc e græca lingua translulimus in latinam. Adiunximus præterea expositiones quasdam breves a nobis inter legendum atque transferendum excogitatas. Neque tamen hac in re duxi in præsentia mihi nimis elaborandum, vel latius evagandum. Joannes enim Picus Mirandulanus vir certe mirandus jam hoc agit ad summum, ubi philosophorum omnium de quavis materia mentes diligentissime discutit. Ac Platonem Aristotelemque de anima mirabiliter monstrat esse concordantes. Librum vero tibi potissimum mihi Valorensi dedicandum. Tu enim una mecum jamdiu concordiam philosophorum hac de re vehementer affectas. Medices vero nostri, quibus tanquam patronis dare omnia, immo reddere consuevimus consentient, proculdubio munusculum hoc unum e multis meo dedicari Valori, & medicæ domus præ ceteris amicissimo & promptissimo semper Platoniorum operum adiutori: quamvis autem græcum exemplar unicum invenerimus, & id quidem mendosum atque mutilatum, attamen lege securus, & ita ceteris præbe legendum: nam emendare hoc atque refarcire diligentissime studui, & Angelus Politianus noster acerrimo vir judicio, plurimaque doctrina, nostram hanc diligentiam approbavit.

Vale, atque lege scilicet, & ceteris præbe legendum. Vale.

